

DOMENIE II DI CUARESIME

Antifone di jentrade cf. Sal 26,8-9

Il gno cûr a ti ti fevele,
ti cûr la mê muse.
La tô muse, Signôr, o voi cirintle.
No sta platâmi alore la tô muse.

O ben: cf. Sal 24,6.2.22

Visiti, Signôr, dal to boncûr, de tô misericordie che di simpri e dure.
Che no vedin di sghignî sore di nô i nestrî nemîs;
Diu di Israel, deliberinus di dutis lis nestrî penis.

No si dîs Glorie a Diu.

Colete

Diu, che tu nus âs ordenât di scoltâ to Fi tant benvolût,
indegniti di passi il nestrî cûr cu la tô peraule di mût che,
purificât il voli da l'anime,
o podìn consolâsi tal contemplâ la tô glorie.
Pal nestrî Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Gjen 12,1-4

Clamade di Abram, pari dal popul di Diu.

Dal libri de Gjenesi
In chei dîs, il Signôr i disè a Abram:
«Lasse la tô tiere, la tô parintât
e la cjase di to pari
par lâ te tiere che ti mostrari.
Jo o farai di te un grant popul,
ti benedissari,
o farai diventâ une vore grant il to non
e tu tu sarâs une benedizion.
O benedissari chei che ti benedissaran
e o maledissari chei che ti maledissaran.
Midiant di te a saran benedîts
ducj i popui de tiere».
Alore Abram al partì come che i veve dit il Signôr e ancje Lot al partì cun lui. Abram al veve
setantecinc agns cuant che al lassà Caran.
Peraule di Diu.

SALM RESPONSORIÂL dal Salm 32

R. Danus, Signôr, la tô gracie: in te o sperîn.
La peraule dal Signôr e je juste
e fedele ogni sô vore.
Lui al ten pe onestât e pe dretece;
dal boncûr dal Signôr e je incolme la tiere. **R.**

Ve, il voli dal Signôr si poe sun chei che lu rispietin,

sun chei che tal so boncûr a sperin,
par sfrancjâ de muart lis lôr vitis,
par tignîju in vite in timp di miserie. **R.**

Viers dal Signôr e brame la nestre anime:
al è lui nestri scût e nestri jutori.
Che al sedi sore di nô, Signôr, il to boncûr,
parcè che dome sun te o stin fidâts. **R.**

SECONDE LETURE 2 Tm 1,8b-10

Diu nus clame e nus fâs lûs.

De seconde letare di san Pauli apuestul a Timoteu

Benedet, patis cun me pal vanzeli confidant te fuarce di Diu. Di fat al è lui che nus à salvâts e nus à clamâts cuntune clamade sante, no in virtût des nestris oparis ma seont il so progjet e la sô gracie, che nus è stade dade in Crist prin dai timps de eternitât, ma che e je stade pandude cumò midiant de aparizion dal salvadôr nestri Jesù Crist. Lui al à disfate la muart e al à fate lusî la vite e l'imortalitât midiant dal vanzeli.

Peraule di Diu.

CJANT AL VANZELI cf. Mc 9,7

R. Laut e onôr a ti, Signôr Jesù!

Dal nûl sflandorôs si sinti la vôs dal Pari:

«Chel chi al è gno Fi il plui cjâr: scoltaitlu!»

R. Laut e onôr a ti, Signôr Jesù!

VANZELI Mt 17,1-9

La sô muse e lusî tant che il soreli.

Dal vanzeli seont Matieu

In chês volte, Jesù al cjolè cun sè Pieri, Jacum e Zuan so fradi e ju menà fûr di man, suntune mont alte. E al comparì denant di lôr trasfigurât: la sô muse e diventà lusorose come il soreli e lis viestis cjandidis come la lûs. E ve, ur comparirin Mosè e Elie tal at di fevelâ cun lui. Alore Pieri al cjapà la peraule e al disè: «Signôr, par nô al è biel stâ culi; se tu vuelis, o farai chi trê tendis, une par te, une par Mosè e une par Elie». Biel che al jere ancjemò daûr a fevelâ, ve che un nûl lusint ju invuluçà. E ve, dal nûl si sinti une vôs che e diseve: «Chel chi al è gno Fi il preferît, là che jo o ài metude dute la mê contentece; scoltaitlu». Sintint cussì, i dissepui a colarin cu la muse par tiere, spaventâts a muart. Ma Jesù si svicinà e ju tocjà disint: «Jevait sù; no stait a vê pôre!». E lôr, alçant i vôi, no vioderin nissun, dome Jesù. Intant che a dismantavin de mont, Jesù ur ordenà: «No stait a fâ peraule cun nissun di ce che o vês viodût, fin che il Fi dal om nol sarà resurît de muart».

Peraule dal Signôr.

Si dîs O crôt.

Su lis ufiertis

Ti preìn, Signôr, che cheste ufierte nus smondei dai nestris pecjâts
e e santifichi il cuarp e l'anime dai tiei fedêi
par preparâju a celebrâ lis fiestis di Pasche.
Par Crist nestri Signôr.

Antifone a la comunion Mt 17,5

Chel chi al è gno Fi il preferît,
là che jo o ài metude dute la mê contentece.
Scoltaitlu.

Daspò de comunion

Ti vin agrât, Signôr,
di vênus fats partecipâ ai misteris de tô glorie,
che nus permetin di gjoldi des robis dal cîl
biel che o sin ancjemò su la tiere.
Par Crist nestri Signôr.

Preiere sul popul

Benedis cuntune benedizion eterne i tiei fedêi, Signôr,
e fâs che a sedin tant tacâts al Vanzeli dal to Unigjenit
di bramâ cence padin e di vê la furtune
di rivâ a chê glorie che lui si è palesât ai Apuestui.
Par Crist nestri Signôr.